

Osh López a logra e titulo di Fide Master den deporte di schaak

ORANJESTAD - For di Trinidad & Tobago, e grato noticia a drenta cu durante e competencia di hungadonan di schaak Sub Zona 2.3.5. Absolute TTO 2014, e hoben Arubiano Jasel (Osh) López di 19 aña di edad, a logra cu un anotacion di 6 punto den 9 wega, su Fide Master titulo (FM) cual a wordo otorga na su persona pa Mr. Allan Herbert durante un ceremonia na clausura di e campeonato den Ambassador Hotel na Trinidad.

Pa Mr. Allan Herbert tabata un gran satisfaccion, pasobra e como "Chairman of FIDE Development Commission", por a nota cu Osh cual e semper a considera como un di e talento mas grandi den Caribe, a logra su Fide Master titulo.

Mr. Herbert tabata sumamente satisfecho, pasobra e tabata semper e gran promotor pa Osh haya e travel-grant di FIDE, cu cual su



participacion na diferente competencia pafo di Aruba a wordo haci posibel, entre otro na Venezuela, San Salvador, Mexico, Ecuador, Brazil. E confianza y inversion den Osh a duna su fruta na Trinidad & Tobago, dia 1 di april 2014.

Logicamente cu pa Osh mes tabata un momento inolvidabel, pasobra durante hopi aña di trabou duro, preparacion,



dedicacion na su deporte favorito, sacrificio, perseverancia y inversion di su tempo, e por a logra obtene su FM titulo merecidamente.

Y ta manera e Presidente di Trinidad and Tobago Chess Association, Sr. Anderson Gordon a declara na final di e wega: "Jasel is not only a good player, but also a happy and helpful and welcoming person".

Fuera di logra su titulo, Osh a demostra cu e no ta solamente un hungado di schaak di taya dedica na su deporte favorito,

pero tambe cu den exterior e ta un digno representante di su pais Aruba, rason pa cual e ta ricibi elogio di e Presidente y di Ehecutionan halto di e organo mundial di tur hungadonan di schaak FIDE.

Osh su estadia na Aruba lo ta uno hopi cortico, pasobra e lo biaha 10 di april caba pa Hulanda, unda e lo bay prepara pa e campeonato Nacional Hulandes bou supervision di KNSB (Koninklijke Nederlandse Schaak Bond) pa hungadonan di schaak bou di 20 aña. Actualmente

Osh ta miembro di e prestigioso Schaak Club Hulandes CAISSA na Amsterdam. Den e ultimo 6 lunanan na Hulanda, Osh a participa na varios campeonato internacional, manera e prestigioso competencia di schaak "17^e Univé Schaaktoernooi 2013" na Hoogetveen y "Schaakfestival Groningen 2013" ambos na Hulanda, "Caissa International Chess Tournament Kecskemet" na Hongarije y tambe na e mundialmente conoci "29th International Chess Open Capelle-la-Grande 2013" na Francia.

Pa Osh e ruta pa e top mundial absoluto den e deporte pensativo aki ta hancha habri, y cu e logro di su FM titulo ariba su propio meritonan, e a pone un paso grandi y firme pa alcanza - na su debido tempo -, e cumbre aki. Aruba y nos tur Arubianonan, por ta orguyoso di tin un yiu di tera cu yen di talento. □